



Broj: 05/1-50-15-26-65-4/19  
Sarajevo, 11. 11. 2019.

## IZVJEŠTAJ

### **sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Državne agencije za istrage i zaštitu**

Sastanak je održan 23. 9. 2019, s početkom u 13 sati, u prostorijama Državne agencije za istrage i zaštitu u Sarajevu. Prisustvovali su: Perica Stanić, direktor Državne agencije za istrage i zaštitu, Đuro Knežević, zamjenik direktora Državne agencije za istrage i zaštitu, Adisa Begić, Nikola Džambas i Vladimir Jurišić, članovi Nezavisnog odbora, te Ivana Lovrić, sekretarka Nezavisnog odbora.

Direktor Državne agencije za istrage i zaštitu Perica Stanić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Adisa Begić, članica Nezavisnog odbora, ukratko je obrazložila razlog posjete. Rekla je da je posjeta organizirana u skladu s dogovorom s posljednje sjednice Nezavisnog odbora, ali i u skladu s Planom rada Nezavisnog odbora za 2019. godinu, s ciljem održavanja kontinuiteta saradnje s policijskim agencijama iz svoje nadležnosti. Na sastanku je razgovarano o realiziranim i planiranim aktivnostima Državne agencije za istrage i zaštitu za 2019. godinu, postignutim rezultatima u borbi protiv aktuelnih sigurnosnih izazova, s posebnim akcentom na terorizam i migrantsku krizu, kadrovsku popunjenost u Državnoj agenciji za istrage i zaštitu, o Zakonu o policijskim službenicima BiH i Zakonu o Državnoj agenciji za istrage i zaštitu, te na saradnju s Tužilašvom BiH i drugim policijskim agencijama u BiH.

Kada je u pitanju migrantska kriza, direktor je istakao da su sve od maja do 18. ovog mjeseca Graničnoj policiji BiH pružali pomoć. Na raspolaganju im je bilo od 15 do 30 pripadnika policijskih službenika iz Jedinice za specijalnu podršku Državne agencije za istrage i zaštitu. Međutim, od Ministarstva sigurnosti BiH su tražili i dobili saglasnost da obustave pomoć dva mjeseca, do 18. novembra, jer u oktobru policijski službenici Jedinice za specijalnu podršku učestvuju u EUFOR-ovoj vježbi „Brzi odgovor 2019“ koja će biti održana u BiH. Ono što

posebno želi naglasiti jeste da sami finansiraju svoje policijske službenike. Nemaju nikakvu finansijsku niti materijalnu pomoć iz bilo kakvih donacija, osim iz budžetskih rezervi iz 2018. godine. Također, istakao je da je planirano potpisivanje sporazuma između policijskih agencija na nivou BiH, entitetskih i kantonalnih MUP-ova, a u vezi sa svim aktivnostima koje se tiču migrantske krize. Suština sporazuma je da će se sve aktivnosti finansirati iz budžeta Bosne i Hercegovine ili doniranih sredstava, s naglaskom da jedni drugima neće zadirati u nadležnosti.

Direktor je istakao da su u proteklom periodu ostvarili dobre rezultate kada je u pitanju zapljena zlata i srebra (oko 150 kg zlata i 130 kg srebra). Zaplijenjena je i rekordna količina narkotika. Također, dobri rezultati su ostvareni i prilikom akcije KASA 1, 2 i 3 na području Istočnog Sarajeva i Mostara.

Što se tiče kadrovske popunjenosti u ovoj policijskoj agenciji, direktor je istakao da je trenutno u ovu agenciju primljeno 15 kadeta koji su od početka septembra na obuci u Mostaru.

Rukovodstvo Državne agencije informiralo je članove Nezavisnog odbora i o Zakonu o Državnoj agenciji za istrage i zaštitu. Istakli su da je Zakon prošao Vijeće ministara BiH te da je trenutno u proceduri u Parlamentarnoj skupštini BiH.

Također, direktor Državne agencije za istrage i zaštitu informirao je članove Nezavisnog odbora da je zadovoljan odnosima s drugim policijskim agencijama u BiH kao i s Tužilaštvom BiH, ali da bi mogli biti i bolji.

Razgovarano je i o međusobnoj saradnji i odnosima između direktora i zamjenika direktora Državne agencije za istrage i zaštitu što je ocijenjeno kao vrlo dobro, u nadi da će tako i ostati.

Članovi Nezavisnog odbora na kraju su naglasili da će Nezavisni odbor i dalje u okviru svojih nadležnosti pružati podršku radu Državne agencije za istrage i zaštitu, te im poželjeli mnogo uspjeha.

Sastanak je završen u 14.15 sati.

**PRVI ZAMJENIK PREDsjedNICE  
NEZAVISNOG ODBORA**  
Enes Obralića